



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**10 Outubru 2017**

**Estudante Sekundariu Eskola Publiku Dom Boa Ventura Same konsidera treinamentu Diretu Labarik no Asesu ba Justisa Formal hosi JSMP importante**

Iha 5 Outubru 2017, JSMP hala'o treinamentu ba Estudante Sekundaria Eskola Publiku Dom Boaventura, Suku Holarua, Sub-distritu Same, Distritu Manufahi kona-ba direitu labarik no asesu ba justisa formal.

Treinamentu ne'e partisipa hosi estudante ensinu sekundariu klase I, II no III hamutuk nain 30 kompostu hosi fetu nain 16 no mane nain 14.

Materia ne'ebé apresenta iha treinamentu ne'e mak kestaun sira kona-ba direitu labarik, instituisaun relevante sira estadu nian ne'ebé iha obrigasaun atu proteze labarik, protesau labarik tuir lei internasionál nomos conseitu kona-ba krime sira ne'ebé akontese hasoru labarik. Aleinde ne'e, JSMP mós introdus knaar Juis, Prokuradór, Defensória Públiku, Advogadu Privadu no Polísia.

“Treinamentu ne'e importante tebes tanba kontinua fahe informasaun kona-ba direitu labarik iha prosesu justisa formal ba iha estudante sira atu hasae sira-nia koñesimentu kona-ba lalaok justisa formal, partikularmente ba direitu labarik ne'ebé mak persiza hetan protesau hosi inan aman ho estadu,” dehan Luis de Oliveira, Diretór Ezekutivu JSMP.

Sr. Julio Lazario Oliveira, Diretór Eskola Públiku Dom Boa Ventura, manifesta ninia sentidu agradesementu wa'in ba JSMP, tanba materia ne'ebé JSMP lori ba nia estudante sira nu'udar materia foun ne'ebé sira seidauk introduz ba estudante sira. Tanba ne'e nia husu ba JSMP atu kontinua treinamentu iha futuru.

Durante treinamentu, estudante sira hatudu sira nia vontade no motivasaun maka'as atu aprende kona-ba labarik sira ninia direitu tuir enkuadramentu legal Timor nian no maka'as obrigasaun inan aman ho estadu atu proteze labarik sira.

Estudante sira hatudu interese maka'as atu hatene kona-ba knaar hosi autór judisiariu sira ida-idak nian iha setór justisa formal, liuliu knaar hanesan juiz, prokurador no defensor ka avogadu durante prosesu iha tribunál.

Iha sesaun husu no hatan, estudante sira ativa tebes, tanba sira konsidera treinamentu ne'e importante tebes ba sira tanba liuhosi treinamentu ne'e hasae sira nia koñesimentu iha área justisa formal liu-liu kona-ba direitu labarik.

Treinamentu ne'e realiza tanba apoiu hosi Embaixada Canada, iha Jakarta-Indonézia

Atu hetan informasaun kle'an liu tan favór kontaktu:

Luis de Oliveira Sampaio

Diretór Ezekutivu JSMP

[luis@jsmp.tl](mailto:luis@jsmp.tl)